

I tīmata te tau hou ki te karakia. I kitea ko Matariki e rere atu ana i te pae. Ahakoa ko te hōtoke, he tino mao te rangi. Arā mātou e noho ana i roto i tō mātou wharenuī, i te taha o te poutokomanawa. I mui mai te katoa o ngā whānau nō te haukāinga, arā, nō Nūhaka. I waimarie hoki mātou ki te kite i te whānau o Rangi i hau mai i te moutere o Tahiti.

Mutu ana ngā karakia mō te tau hou, ka hau atu te māpū ki roto ki te wharekai kai ai. I kainga ko ngā kai pai nō te ūkaipō o tātou te tangata, arā, nō Papa-tūā-nuku. Ko te kūmara nō te māra o Koro Hone, te pūhā nō waho o te whare o Nana Mere, me te maha o ērā atu kai i taona ki roto i taku umu, otirā ko ngā kai nō te tai.

Ka tūtaki ngā whānau ki ērā atu o ngā whānau. Ka kitea ko ngā pēpi ihu hūpē o te kāinga, rātou ngā tamariki whakatoi, ngā tama hoihoi, ngā kōtiro whakahīhi. Koirā kē te pai o te wāhi pēnei i a Nūhaka, he maha ngā tūmomo rōpū.

Mutu ana ngā mahi o te ata, ka pīrangi te katoa ki te haere ki awa hoe ai. Rere wahangū ana te wai me ngā pīpī rakiraki e whakaakohia ana e ō rātou mātua ki te kaukau.

Ka tae atu ngā whānau ki te awa, ka uru ki ngā waka, ā, ka rangona ko ngā hoe e pao ana ki te mata o te wai. Ka haere rātou ngā tāne mau pū ki te ngau poaka, ki te whaiwhai tia. Ka rangona ngā pū e pūhia ana i te awa. Kātahi ko ngā tāne mātau ki te whakamahi pū ko rātou. I te awa, i muri i ngā otaota toetoe e tipu roa ana, ka tākaro ngā tai tamariki i te mūrere. Ko tōku teina te toa o Nūhaka. Engari nā te hē o tētahi o ngā nekehanga, ka hinga ko ia i te rā nei, heoi ka haere tonu ngā kēmu.

Ka pau haere te rā, kotahi atu te hoki a te iwi ki te marae. Ka kawea ko ngā karakia o te pō e ngā kaumātua, ā, i rangona ko te tūi e waiata ana, i kitea ko te kererū me ōna tae ātaahua e rere mai ana i te tihi o te rākau o waho atu o te wharenuī, ki tōna kāinga ake, ki Te Wao Nui a Tāne.